

Darumb ein löblicher/adelicher/rechtmässiger Falckner vnd Federweidmann sein hurtig/ vnd am Gemüt ganz sanfft vnd gedultig seyn/sich keiner arbeit/gehens noch reitens verdriessen sol lassen/vnd darumb auch solche löbliche adeliche Falcknerey vñ Weidwerck / mit grosser arbeit vnd sonderm fleiß vben vnd brauchen/allein das er den Müßiggang fliehe/vnd also wegen vermittnen Müßiggangs anderer Schand vnd Laster / so auß dem Müßiggang sonst herkommen / mit theilhaftig werde.

Daher von Heiden sein gedichtet wirt / das die Diana daruñ stäts zu Wald liege vnd jage/ das sie dadurch den Müßiggang zu fliehen/vñ ire Keuschheit zu verwahren gemeinet sey. So liest man auch von Melanione/vnd Hippolito Thesei Son / das sie ihre Keuschheit vnd Jungfrawschafft zu erhalten/ nicht müßig gehen / sondern mit stätigem jagen haben vben wollen.

Der erste Meister der Falcknerey/so als ein Liebhaber der Weisheit / Tugend vnd löblicher vbung/von dem Liecht der Natur sonderlich erleuchtet/ist gewesen der König Dancus/Er war ein trefflicher Meister die Habich/Falcken vnd Sperber zahm zu machen/sie an jren Kranckheiten zu curiren vnd arzneyen/vnd also abzurichten/das sie allerley Vögel/auch Hasen zu fahen / nach jrer Natur/vnd seinem willen vnd begeren verbrachten.

Vnd ist zwar ein herrlich ding zu sehen/wenn ein solcher wilder vnd grüninger Vogel dermassen abgerichtet wirt/das er einsmals also in die höhe auffzeuch / vnd sich aber bald widerumb auff die Faust seines Falckners sencket. Item/das er also den Raub vnd andern Vögeln bis in die Wolcken nachfolget/vnd dasselbige erwürget. Das er auch darzu dem andern Wassergeflügel/vñ auff dem Erdbodem den andern Vögeln nachjagt: Zu dem auch die vierfüßigen Thieren/als Hasen vnd Königlin nachflieget/vnd dieselbigen fahet.

Darumb sie billich vber dieser Adelichen Falcknerey Kunst hoch zu verwundern / auch löblich/hoch vnd adelich zu halten ist. Denn mit dieser Kunst allerley Raubvögel anzubringen vnd abzurichten seyn/damit man den andern Vögeln in der Luft auff dem Erdbodem / vnd im Wasser nachjagen / vnd sie mütig anfallen vnd rauben mag / wie im andern Buch weitläufftigere anzeigung beschehen soll.

Das ander Capitel.

- Vom Falckner oder Habicher / Auch von der Falcken / Kapp oder Hauben / Geschüch / Seleute oder Schellen/ Handschuch vnd Sitzstangen/sampt darzugehörigem Luder/Federspiet oder Borlas.



Er Falckner oder Habicher soll ein feiner gewachssener gerader Mann seyn/sein freundlich/lind vnd sanfftmütig vnd holdselig/ vnd von vielen andern guten lieblichen Geberden vnd Sitten / Er soll mütig vnd freudig seyn/vnd zum Falcken/Weidwerck vnd Beissen / vberaus trefflichen vnd guten lust haben. Wenn der Falck misthäte/so soll er nicht zornig werden/vnd ihn darumb vbel anfahen/schelten vnd schnarcken / oder in etwann auch zucken / fressen vnd schlagen/